

Trabou di construccion riba Baby Beach ta bayendo biento en popa

Ta pidi publico pa tene atencion cu area di trabou lo ser marca y cera

ORANJESTAD - E siman aki lo tin mas trabou riba e beach mes pa loke ta trabounan necesario pa upgrading di Baby Beach. Awor lo cuminsa pone mas facilidad riba e beach mes. E area cu ta trahando temporalmente ta cera cu heki of marca claramente pa seguridad di usuario y publico lo ripara mas movecion di construccion. Aunke cu acceso na beach y awa ta keda disponibel semper, e trabounan di remodelacion por trece cierto inconveniencia cune. Ta pidi pasenshi y comprension di henter comunidad pa cualkier molester temporal. E trabounan ta progresando conforme e schedule planea y ta ser haci pae conocido compania Arubaanse Wegenbouw maatschappij y ALBO Aruba NV. Trabou di supervision ta na encargo di D.O.W. y e proyecto ta financia door di Fondo Desaroyo Aruba (F.D.A.).

E reaccion di usarionan



na beach tabata sumamente positivo, unda cu tabata contento cu e trabounan ta tumando lugar. E aspecto cu a mantene vegetacion existente y a amplia e area di beach ta ser mira tambe como positivo pa esnan encuesta. Supervisor

di Albo, Pascual Irausquin, y controlador di DOW, Robert Luydens, ta refleha positivamente riba e progreso na e sitio, mustrand cu tur cos ta segun schedule. Apesar di e solo cayente e reaccion positivo di usarionan y e

bista abrumador di e sitio, ta duna un satisfaccion pa tur e trahadonan na e sitio.

Manera anteriormente publica caba, esaki ta forma parti di e trabounan di Coastal Zone Management (CZM) cual ta parti di un plan integral pa maneho di costa, lama y beach. E trabounan di mehoracion di calidad di beach ta encera 1) structura acceso y parkeo, 2) embeyecemento di paisahe natural, 3) instala mas facilidad pa publico, incluso borchinan informativo. E prome aspecto cu lo drecha na Baby Beach, lo ta e area cu ta separa e santo blanco di beach for di e caminda y luga pa parkeer vehiculo motorisa. Lo kita e muraya bieu y den mal condicion y lo cuminsa instala e demarcacion nobo mas representativo y funcional. Esaki lo preveni santo bruin mescla cu e santo blanco como tambe lo forma un barera pa evita auto of otro vehiculo motorisa subi riba e beach.

BABY BEACH LO SIRBI COMO EHEMPEL

Baby Beach ta un di e tres beachnan publico (e otro nan ta Arashi cual ta bou construccion actualmente y Mangel Halto cual ta cuminsa na November

proximo) cual ta prome yama pa ricibi mehoracion ariba, como cu e ta un beach publico hopi usa tanto pa local como turista. Haciendo esaki un proyecto cu, ademas di embeyecimento, ta traha structuralmente riba proteccion di naturalesa y medio ambiente pa bienestar general. Ademas cu Baby Beach tin un balor natural halto, Baby Beach ta gosa tambe di balornan cultural y recreacional halto, particularmente cerca comunidad local mes. E prome fase aki ta dirigi pa pone den practica e ideanan con lo maneha tur beachnan publico den futuro cercano.

Pa medio di zonificacion, esta asigna zonanan specifico pa diferente tipo di uso (of prohibicion di uso) lo yega na beachnan mas ordena, miho organisa y cu ta ofrece un miho experiencia na tur usuario. Na yegada di Baby Beach usarionan lo haya indicacion cu a drenta un area di balor halto cual ta resorta bou di maneho estricto. Ademas di indica e nomber di Baby Beach lo tin tambe borchinan di informacion cu ta splica e regla y leynan di kico mag haci y kico no mag haci, como tambe indicando e balornan natural y cultural presente na Baby Beach. Luga pa core of parkeer, y consecuentemente luganan cu no ta permiti core cu auto of vehiculo motorisa, lo ta bon demarca. Tambe lo separa esakinan pa medio di muraya y/of barancanan pa entre otro no permiti vehiculo motorisa core mas riba santo blanco. Envolvimento di e.o. Polis di bario ta hustamente pa mantene orden y esnan cu kibra regla lo ser atendi debidamente y por conta cu lo haya boet tambe si ta necesario. E vision ta pa tin un beach publico natural cu ta brinda tur usuario un experiencia di calidad y cual lo keda preserva pa termino largo.